

Sakspapir

Saksbehandler	Arkiv	ArkivsakID
Jo Bjarte Tømmerbakke		23/13

Saksnr	Utvalg	Type	Dato
	Kommunestyret	PS	
008/2023	Formannskapet	PS	31.01.2023

Strøyming av politiske møte i Modalen kommune

Forslag til vedtak:

Kommunestyret i Modalen vedtek å ta i bruk kommune-TV løysing for direktesending av kommunestyremøte og publisering av sendingane i etterkant av møta.

Løysinga skal takast i bruk frå og med mai 2023.

Saksopplysningar:

Bakgrunn

Kommunelova legg føringar for gjennomføring av politiske møte. Det er krav om kunngjering av tid og stad, saksliste og møtedokument skal vere tilgjengeleg for allmenta (§11-3). I tillegg har alle rett til å kunna vere til stades i møte i eit folkevalt organ, med mindre organet vel å lukka møte av omsyn til teieplikta, (§11-5).

Koronapandemien førte til at mange kommunar valde å bruke digitale kanalar ved gjennomføring av politiske møte. Kommunaldepartementet la til rette for fjernmøte via eiga forskrift og kommunane såg behov for å gjere møte tilgjengeleg for interesserte på ein ny måte.

Modalen er del av IKT samarbeidet i Nordhordland saman med 10 andre kommunar. Her er det gjort avtale med verksemda Aventia som leverer ulike modular til politiske møte. Dei første IKTNH kommunane tok i bruk løysinga i 2019. Av dei 11 samarbeidskommunane er det Modalen og Masfjorden som ikkje har teke i bruk ei løysing. 6 kommunar nyttar Aventia si løysing, medan 3 kommunar nyttar Teams, Youtube eller Facebook.

Då kommunestyresalen på Flodmaal vart bygd, vart det kjøpt inn digitalt utstyr for eventuelle sendingar av politiske møte. Salen har lydsystem i tak, eit kamera plassert bak i rommet og kopling

mot projektor for strøyming av presentasjonar.

Aventia presenterte løysinga for medlemmene i førre kommunestyremøte. Løysinga kan også nyttast til interne kurs, folkemøte og andre tilstellingar som vert gjort i kommunestyresalen.

Vurdering

Systemet har integrasjon mot kommunen sitt saksbehandlingssystem med automatisk oppretting av møte med saksdokument knytt til dei einskilde sakene. Systemet er enkelt å drifte undervegs i møte, med knappane start, pause og slutt. I tillegg kan ein knytte bokmerke til sendinga slik at dei som ser sendinga er oppdatert på agenda.

Det er mogleg å gjere opptak for deretter å publisere seinare, men ein kan også sende direkte. Ved direktesending opplever ein nokre sekund forseinking frå opptak til publisert på nett, men det ikkje mogleg å fjerne opptak frå direktesendinga.

Etter møteslutt må det gjerast ein mindre redigeringsjobb for å sikre at dokument og bilde samsvarar. Av ressursbruk er det i hovudsak test av lyd og bilete i forkant av møte som er mest tidkrevjande då oppdateringar frå windows og ulike system som skal snakke saman. Erfaringsmessig har Aventia kort responstid på support. Ressursbruk knytt redigering og sending i møte er nokså lite.

Dersom ein kjøper Aventia sine tilleggsmodular er det mogleg å legge inn forslag til vedtak, gjennomføre votering og lage talarliste digitalt i kommune-tv. Då vil innbyggjarane i kommunen også kunna følgja med på det som i dag går føre seg i møteportalen. Tilleggsmodulane vil krevje meir av representantane og ordførar under møte. Slik situasjonen er i dag, ser ikkje rådmannen behov for å ta i bruk tilleggsmodulane.

Konklusjon

Modalen kommune gjennomfører møte på dagtid på Flodmaal. Møta er opne for publikum, men fysisk oppmøte er avgrensa, mellom anna fordi mange er i arbeid eller på skule. Med kommune-tv vil møta vere meir tilgjengeleg for innbyggjarar og andre interesserte. Partar kan finne spesifikk sak og få med seg behandlinga i ettertid. Strøyming av politiske møte vil opne for at fleire får med seg kva som rører seg i kommunen og innbyggjarar kan engasjere på eit heilt anna nivå enn slik det er i dag.

Rådmannen tilrår difor at kommunestyret vedtek å ta i bruk kommune-TV løysing for direktesending av kommunestyremøte og publisering av sendingane i etterkant av møta.

Kommunestyret bør ta stilling til om også møta i formannskapet og næringsfondstyret skal strøymast på same måte som kommunestyremøta. Dette kan ein evt gjere på eit seinare tidspunkt, når ein har prøvd ut løysinga på kommunestyremøte ei stund.

Formannskapet - 008/2023

FOR - behandling:

Samrøystes vedteke

FOR - vedtak:

Formannskapet sender saka vidare til kommunestyret utan innstilling